

I. DISPOSICIÓN XERAIS

MINISTERIO DE FACENDA

7345 *Orde HAC/553/2019, do 24 de abril, pola que se modifica a Orde HAP/1724/2015, do 31 de xullo, pola que se regula a elaboración da Conta Xeral do Estado.*

A Lei 47/2003, do 26 de novembro, xeral orzamentaria, regula nos seus artigos 130 e seguintes a estrutura da Conta Xeral do Estado, a súa formación pola Intervención Xeral da Administración do Estado, así como a súa posterior remisión ao Tribunal de Contas.

Mediante a Orde HAP/1724/2015, do 31 de xullo, regulouse a elaboración da Conta Xeral do Estado e establecéronse as especialidades para aplicar na elaboración da dita conta xeral en relación coas normas sobre consolidación de contas no ámbito do sector público, aprobadas pola Orde HAP/1489/2013, do 18 de xullo.

A dita norma supuxo a elaboración da Conta Xeral do Estado como unha conta única consolidada desde a correspondente ao exercicio 2014 e de, desta forma, cumprimento tanto ás declaracións do Tribunal de Contas como ás resolucións aprobadas polos plenos do Congreso dos Deputados e do Senado en relación coa declaración da Conta Xeral do Estado de exercicios anteriores.

Ao longo dos seguintes exercicios foise avanzando paulatinamente no proceso de consolidación da Conta Xeral do Estado. Co obxecto de continuar progresando, considérase o momento adecuado para afrontar a consolidación do imposto sobre beneficios corrente, e das cotas, prestacións e gastos sociais por conta do empregador.

Por outro lado, a información en termos de contabilidade nacional que se incluía até agora na Conta Xeral do Estado era a correspondente aos últimos datos de carácter definitivo notificados á Comisión Europea e referíase a un exercicio diferente ao resto de información incluída na Conta Xeral do Estado.

Co obxecto de que a información en termos de contabilidade nacional inclúa tamén información referida ao mesmo exercicio que o resto de información incluída na Conta Xeral do Estado, engádese á información actual a correspondente aos últimos datos de carácter provisional notificados á Comisión Europea.

Así, esta orde estrutúrase nun artigo único e unha disposición derradeira.

O artigo único modifica os artigos 7 e 9 da Orde HAP/1724/2015 pola que se regula a elaboración da Conta Xeral do Estado.

A disposición derradeira regula a entrada en vigor da orde.

A aprobación desta orde realízase por proposta da Intervención Xeral da Administración do Estado, de acordo coas competencias que ao dito centro directivo lle outorga o artigo 124.c) da Lei 47/2003, do 26 de novembro, xeral orzamentaria, para determinar o contido, a estrutura, as normas de elaboración e os criterios de consolidación da Conta Xeral do Estado.

Na súa virtude, de acordo co Consello de Estado, dispoño:

Artigo único. Modificación da Orde HAP/1724/2015, do 31 de xullo, pola que se regula a elaboración da Conta Xeral do Estado.

A Orde HAP/1724/2015, do 31 de xullo, pola que se regula a elaboración da Conta Xeral do Estado, queda modificada como segue:

Un. Suprímese a letra b) do artigo 7 «Información que se deberá incluír na memoria consolidada».

Como consecuencia da dita supresión, renumérase o resto de letras do citado artigo 7, de forma que as letras c), d), e), f), g) e h) pasan a ser as letras b), c), d), e), f) e g), respectivamente.

Dous. Modifícase a nova letra g) do artigo 7 «Información que se deberá incluír na memoria consolidada», que queda coa seguinte redacción:

«g) Introdúcese o número 18. «Información en termos de contabilidade nacional» seguinte:

18. Información en termos de contabilidade nacional.

Na Conta Xeral do Estado incluírase información relativa ao resultado obtido pola Administración central e polos fondos de Seguridade Social en termos de contabilidade nacional, determinado de acordo cos criterios de delimitación institucional e imputación de operacións establecidos no Regulamento (UE) n.º 549/2013 do Parlamento Europeo e do Consello, do 21 de maio de 2013, relativo ao Sistema europeo de contas nacionais e rexionais da Unión Europea (SEC-2010), e demais normativa comunitaria aplicable, de acordo cos modelos previstos no anexo III desta orde.

A información que se deberá incluír coincidirá cos últimos datos de carácter provisional (que serán os relativos ao exercicio a que se refire a conta xeral) e os definitivos (referidos ao exercicio anterior a aquela) notificados á Comisión Europea en cumprimento das obrigacións impostas aos Estados membros polo procedemento de déficit excesivo regulado no Regulamento (CE) n.º 479/2009 do Consello, do 25 de maio de 2009, modificado polo Regulamento UE n.º 220/2014 da Comisión, do 7 de maio de 2014.»

Tres. Suprímese o número 1 do artigo 9 «Tratamento de determinadas operacións». Como consecuencia da dita supresión, renuméranse o resto de números do citado artigo 9, de forma que os números 2, 3, 4, 5, 6, 7, 8 e 9 pasan a ser os números 1, 2, 3, 4, 5, 6, 7 e 8, respectivamente.

Disposición derradeira única. *Entrada en vigor.*

A presente orde entrará en vigor o día seguinte ao da súa publicación no «Boletín Oficial del Estado».

Madrid, 24 de abril de 2019.—A ministra de Facenda, María Jesús Montero Cuadrado.